



聖宋名賢五百家播芳大全文粹卷三

賀表

代賀立后表

胡武平

臣妾言恭以紹興大寶崇建長秋凡在幅幘孰不欣
抃伏惟 皇太后殿下慶鍾沙麓光協壽房蘊四德
以兼徽契千齡而偶聖玉衣之夢素協于奇祥金穴
之華早膺于妙選屬大橫之纘服奉禴翟以正名抑
有典常允歸謠頌永正軒龍之體長扶璇極之尊與



乾同休配坤惟厚臣妾無任歡呼屏營之至

立后賀皇帝表

陳君舉

父作子述增光典謨身修家齊匹休南雅屬彌文之
具舉罄羣聽以交歡中賀恭惟皇帝陛下得聖之
傳繼天之統深惟內則莫隆媯汭之風粵自初潛元
重塗山之選爰稽謀于慈極以秩正于中宮予以成
未央奉觴為壽之歡予以對長樂含飴弄孫之福遐
觀往古孰盛當今臣假守偏城欣聆鉅典但糜廩粟

曾無僕馬之勞當課農桑以廣耕蠶之化

賀冊皇后表

蘇子瞻

纘女維莘倪天之妹事關廟社喜溢人神中賀臣聞
三代之興皆有內助二南之化實本人倫維關睢正
始之風具既醉太平之福民有所恃邦其永昌恭惟
皇帝陛下自誠而明惟睿作聖輯寧夷夏德既茂
於治朝輔順陰陽政兼修於內職既膺大慶益廣至
仁下逮海隅夫婦無有愁歎上符天造日月為之光

明受祿無疆與民同樂

賀冊皇后表

吉日既涓柔儀允正穀珪往聘象服來朝中賀臣聞
周姜任姒之賢位皆非極漢陰馬鄧之貴德或有慙
盛哉六禮之陳襲此三宮之慶恭惟 太皇太后陞
下任付託之重躬保佑之勞公天下不私其親配宸
極必先以德徽音不墜嗣成慈孝之風仁壽無疆坐
享雲來之養臣限以官守不獲躬詣闕庭

賀冊皇后表

代

陳履常

爰歷靈辰肇修內職禮成一代風動四方中賀臣聞
朝廷之治本乎家婚姻之道正乎始爰求茂族用酬
哲人龜筮協從人神同福恭惟 太皇太后陛下憂
深廟社謀及子孫既成天德之剛復修陰禮之助本
支百世浸被周南之風壽考萬年膺受天下之養臣
職當守王世受懋恩欣聞大禮之行莫預外庭之賀

賀冊皇后表

陳履常

龜筮協從古今同貫盛儀既舉休氣來臨中賀竊以
三后興邦必有同心之助六朝成憲著聞積德之升
惟關雎左右之求有思齊十百之報人有所仰邦其
永昌恭惟 皇帝陛下既聖不居持成如始攷圖數
貢盡雨露之所濡緯地經天宜陰陽之備位爰因誕
聖遂正洪名德配二宗並有照臨之意功施四海居
無怨曠之聲豈意莫年數逢盛事

賀冊皇后表

功德兼茂禮命載崇慶自宮闈達于寰海中賀竊惟
母以子貴既三代之舊章位以次升乃六朝之盛德
惟紫庭之虛位更寶曆之累年雖聖念退抑以未違
而天下屬望之有在嗣既自出天猶不違爰歷靈辰
茂膺大典恭惟 皇帝陛下寅畏天地攷法祖宗以
義勝私出入詩書之府由今望古度越周召之風爰
興舉於上儀用光華於盛旦室家胥慶日月增明萬
物順成氣得陰陽之備三靈錫羨壽有岡陵之崇

賀冊皇后表

汪彥章

帝圖內治天錫柔儀前占龜筮之祥懋舉禕禕之禮
中賀伏以坤承天而乃順日受月以為明不表徽音
孰修陰教既輔成於全盛宜登配於至尊恭惟 皇
帝陛下誠以齊家孝於尊禰爰正軒星之象用承長
樂之顏臣久冒明恩欣聞盛典雖外庭稱慶莫陪百
辟之趨然輔郡承流行被二南之化

賀冊皇后表

晁詠之

帝德御天化成九有坤儀正位慶浹萬邦凡預生成
舉同抃蹈 中賀 竊以在昔盛世惟先哲王必有正順
之質來會休明之運實惟天作非特人謀恭惟 皇
帝陛下道格家邦教敷中外法堪輿之覆載叅日月
之照臨時享罄九廟之恭聿求助祭日嚴致兩宮之
奉思盡承顏宜有柔順利正之姿以配聖神文武之
德惟時淑媛式協昌期筦簞即安已應高禩之慶宮
闈蒙化蚤形彤管之風是宜稽合典章崇正位號以

篤皇天之眷命以承永世之丕休臣祇荷厚恩側聆
盛典仰二儀之化育載深螻蟻之情罄萬壽之歡呼
莫預鴛鸞之列

賀冊皇后表

劉莘老

椒房懿德寶冊降衷慶溢宮闈歡騰海宇中賀竊以
握乾垂統必資助於坤柔治外宣風亦先成於內治
母儀斯備婦順以明稽合舊章楙隆新制恭惟 皇
帝陛下纘承丕緒紹復洪圖踵遐武之重光措函生

於累洽先乎民物明王者之至公及于閨門著天下
之大義維皇立配於國承家載嗣徽音將以正心而
逮下不加崇號無以示民之有尊誕錫洪名榮褒淑
德然家人麗正講聞義易之辭而君子好述載美關
雎之義自古所重于今是稱位定壺中化成天下

賀冊皇后表

中闈正號佑天德之大明四海蒙休慶國風之有本
禮嚴宮掖歡浹海隅中賀恭以 皇帝陛下以上主

之資履重熙之祚至仁冒乎天地濬哲嗣乎祖宗謂
聖人之功重乎治內而天下之定始於正家詔典冊
於有司進坤儀之徽號仰恭廟祀下厚人倫

賀冊皇后表

蔡君謨

儷尊皇極宅正位於天閨配德紫宸膺鴻名於寶冊
海內臣妾抃蹈以之中賀臣聞文命造邦塗山所以
宣內助重華嗣聖皇英所以輔至明宗廟歆其薦羞
穹壤因而垂祉載光懿範永屬熙朝恭惟 皇帝陛

下纘服睿圖席休寶緒兩儀均大含生荷亭育之恩
二耀高臨品物仰照臨之德是以淑譽流於區域陰
教序於宮闈用贊皇猷必崇位號加麗禕衣之貴增
光彤管之華臣忝寄藩方限遙天陞

賀冊皇后表

熊子復

儀虛中壺孰參協帝之圖祥降上穹爰錫倪天之配
光華振古鼓舞含生中賀臣聞舜釐虞嬪亶于媯汭
文纘莘女實在洽陽用能致孝而襲帝堯之行無憂

而紹王季之作何幸五三之懿則乃當千一之昌期
恭惟 皇帝陛下獨運聖謨同符祖烈復古而內修
政既操天德之剛治國而先齊家亦資陰教之順遵
燕謀於太上正鴻號於長秋以安九廟之靈以定六
宮之度臣欣傳盛事阻造明廷原隰方勤愧久被皇
華之寵乾坤既合知永扶太極之尊

賀冊皇后表

許仲啟

剛德體元載叶離明之繼柔儀禮內式揚坤厚之承
治洽六宮懽騰萬寓中賀恭惟 皇帝陛下肇丕王
化致察人倫仰怡重慶之顏夙資輔政俯正長秋之
位偕奉旨甘若稽神禹之謨盖有塗山之助迺迎穀
旦俾陟椒房臣屬與分符逖聞發冊王心誠意識聖
道之造端易俗移風必禮經之仍舊

賀冊皇后表

趙德莊

天心作配是開倪妹之祥坤德無疆式正象星之序
吉符龜筮望協人神竊以陰陽迭運則四時成日月

並照而萬物麗塗山啟而興夏姜嫄降而生周故當
睿智有臨之時必有恭儉節用之助禮斯為重教所
由興恭惟 皇帝陛下再造丕基系隆景命敬脩以
遠聲色克勤以御家邦清廟精禋謹春秋之明薦東
朝至養承朝夕之慈顏丕惟輔佐之求宜遴柔良之
選載稽故實爰講祲儀上尊母訓之嚴下徇官師之
請章璽綬以備物儼禕褱以展容芳懿揚於椒房高
明儷乎宸極人倫既正風 始於關雎王化攸基時

自臻於麟趾臣等久蒙樂育獲際盛明丕顯其光知
四方之賴慶乃占我夢期百世之垂休竊同遐邇之
心俯 驩愉之詠

賀冊皇后表

天祚有德益享太平之休文定厥祥聿求內助之懿
肅使介以將命備典冊而揚庭幅負有生鼓舞相慶
臣某 中賀竊以體坤元而育萬物主陰教以統六宮
得關雎之窈窕而無傷善之心躬卷耳之憂勤而有

進賢之志足以靈承宗社作合聖神維時母儀選自
世胄奉珪幣之聘而講希濶之典致禕翟之飾而崇
正始之風緝禮煥乎非常歡聲震乎無外此蓋 皇
帝陛下文明天縱睿智日躋緝熙昭考之康功燕翼
之母之慈訓眷圖邦媛表正宮闈警戒相成豈特輔
唐虞之際盛柔嘉維則固將繼任妣之徽音臣叨備
遠藩親逢嘉會祝聖人之多子竊慕堯封頌天子之
萬年敢忘虎拜屬拘官守不獲躬詣闕庭

冊皇后賀至尊表

許仲啟

仰聖慈訓治形端本之餘肇正柔儀德顯嗣徽之盛
中賀恭惟 至尊壽皇聖帝陛下多能將聖建極惟
皇舜既察於人倫周猶基於王化陳槐宸之流冕以
授儲君總椒掖之禕褕俾登賢婦臣尚叨假守莫獲
隨班道廣二南想問安之自內教惟五品知繼志之
得人

賀冊貴妃表

王介甫

侵盛之禮發於宮闈驩康之聲播於寰海中賀恭惟
皇帝陛下倣古之憲刑家以身乃資婦德之良俾
貳坤儀之政蓋關睢之求淑女以無險詖私謁之心
雞鳴之得賢妃則有倣戒相成之道於以求助不專
為恩臣生逢明時竊觀盛事祝聖人之多子輒慕堯
封思令德以式歌豈慚周雅

賀冊貴妃張氏表

王禹玉

今月三日文德殿發冊貴妃禮畢者伏以國風之始

蓋推厚于人倫君德之明亦參祈于內助故命妃之
制上憲于紫纒告廷之華圖永于徽冊伏惟 皇帝
陛下懷天地之祐格祖宗之靈以寔紹于家邦以延
鴻于基緒再維廟享之奉乃眷掖英之宜飭婦順之
修協敷于風化無私謁之志永念于憂勤諏今日之
協龜詔有司之發號服褫翟之飭以冠內外之儀詠
螽斯之篇當協眾多之喻慶宜皇壺位亞坤闈臣某
等早會聖期偕榮朝叙觀上儀之畢舉磬多抃以來

同

賀降皇太子表

王介甫

甲館告寔天為百瑞恩言周布歡動四方中賀臣聞
聖則多男人之所祝冠而生子古以為祥恭惟昌期
宜有昭報上以慰而宮之念下以為萬世之基凡在
寰區舉興善頌伏惟 皇帝陛下聖神文武睿哲温
恭以天縱生知之資務日就默識之學內修法度煥
然一代之文外服戎夷終自兩階之舞承列聖之丕

緒方懷燕翼之思以百姓而為心宜有子孫之福益
著思齊之聖更形既醉之詩十四月而生堯已有同
德之兆千萬歲而壽武願同庶物之心

賀降皇太子表

前星騰耀麗日重光凡在照臨舉傾瞻仰中賀臣竊
以漢室之尊冢嗣遂立高禘堯封之祝聖人俾多男
子蓋承祧之至重任主器以非輕恭惟 皇帝陛下
駿惠先猷作新聖治奉天以敬恪勤父事之心養物

以慈摩撫子來之俗蓼蕭被澤行葦霑仁穹昊駢禧
元良毓秀為社稷久長之慶承祖宗積累之休遣使
告陵重離明之有繼飛郵肆青達解雨於無垠臣承
乏遠方欣聞吉語震雷虩虩知七閩之克堪螽羽詵
詵期子孫之寢盛

賀降皇太子表代

晁詠之

德符穹昊慶集宮闈篤生岐嶷之資來會明昌之運
照臨所逮鼓舞攸同中賀竊以固有永之基莫先主

器紹無疆之服蓋本承天下以宅萬國之歡心上以
豫兩宮之愜志願茲大慶允屬熙辰此蓋 皇帝陛
下德動幽明仁均動植合天心而克享祇帝事以靈
承神罔怨恫物無違拒是以三靈薦祉九廟儲休克
綏龜筮之祥爰發熊羆之夢是生粹質作我元良臣
待罪西陲馳心北闕上萬歲之壽阻陪漢殿之班詠
百男之詩載効華封之祝

賀降皇太子表

李成季

太史觀天已識前星之應大人占夢果符男子之祥
喜溢宮闈慶均海宇中賀竊以誕彌厥月有開后稷
之先則百斯男於顯文王之盛由人神之相與荷福
祿之無窮恭惟 皇帝陛下孝安祖宗仁遂動植疏
爵賞以繼功臣之世發廩庾以惠天民之窮廣大德
以好生示神武之不殺萬事成理允格丕平四夷皆
來實獲多助三神昭鑒六聖具依載錫洪休篤生元
嗣至誠能動無待薦高禱之牲流澤有源何煩種北

宇之竹况乃岱祇見象媯聖呈光共扶萬世之基來
兆一人之慶岐嶷之性先得於神靈聰明之資將
弗煩於師傅大本有系眾情以熙臣猥服外僚親逢
盛事上南山之壽阻預班聯誦螽斯之章莫知鼓舞
賀降皇太子表
宋子京

寶祐叢林天支毓秀慶騰秘禁歡溢中區中賀恭惟
尊號皇帝陛下受命普將凝圖丕赫權綱用義根
乎克念之虔簡素所安表于不勉之懿且復欽刑薄

賦重穀弛畋一方少饑則系馳使節萬金稍乏則輒
績禁錢民用靜嘉神罔恫怨是以上帝欽佑三后顧
存詒美孫謀昭行無疆之烈歸功元首茂啟多男之
祥誕協仲商挺生哲嗣星弧具禮天第交華惟翕闡
之儲英固覃訏而絕異逖聆詔諭並仰獻儀薦笏相
趨抃吾君之有子珪璋流愛宜天下之繫心臣始去
近聯遽承吉語賡歌綿迭早知周德之遐參祝祠禱
罔逮漢臣之幸臣限守符印不獲奔詣闕廷臣無任

瞻天樂聖企竦歡呼之至

賀降皇子表

王介甫

燕禠享德方儲錫羨之祥羸夢生賢克協會昌之運
預在照臨之廣敷同慶賴之深中賀竊以思齊神罔
時恫假樂民之攸墜天所保佑厥惟大妣之多男國
之榮懷亦曰文王之衆子恭惟 皇帝陛下令德光
乎洛誦康功茂乎岐昌鴻休無疆景命有僕蓋芟苜
之薄言采采眾樂先成則螽斯之宜爾振振宗強孰

御臣久叨眷遇適阻進趨親值本支百世之盛時敢
忘壽考萬年之善祝

賀降皇子表

王介甫

嘉慶系傳歡騰總集 中賀臣歷觀古昔誕受福祥厥
配天所以久長乃有子至於千億伏惟 皇帝陛下
鳧鷖之雅媚於神祇芣苢之風燕及黎眾弓韉嗣燕
謀之報旄旗仍熊夢之祥無疆惟休永保桑苞之固
有室大競方觀椒實之繁臣嘗汙近司久尸榮祿時

荷殊憐之至豈勝切憇之深臣無任

賀降皇子表

王介甫

本支浸衍實為萬世之休遐邇同欣胥賴一人之慶
中賀臣聞王懋厥德則后妃無嫉妬之心天錫之祺
則子孫有眾多之美蕃釐有繼垂裕無窮伏惟 皇

帝陛下躬睿智之資撫休明之運教由內始政自身
先治既格于人和誠遂膺于帝祉乃占我夢實多考
室之祥則百斯男克紹刑家之慶臣叨榮特厚切抃

尤深雖接武縉紳莫預造庭之列而瞻威咫尺惟傾
就日之誠

賀降皇子表

王介甫

宮闈嗣慶寰海交忻凡逮戴天惟均擊壤中賀臣聞
螽斯之言眾子是為王者之詩華封之祝多男亦曰
聖人之事恭惟 皇帝陛下紹祖休顯憲天昭明致
文武之憂勤成堯舜之仁孝宅師無競莞篲之寢既
安傳類有祥弓韉之祠屢應詒謀方永錫美用光臣

託備藩維叨承眷獎不顯亦世家實預於榮懷於萬
斯年心敢忘於慶頌

賀降皇子表

伏以熊羆之兆載于詩雅弓韉之祥著諸典禮蓋以
保育黎元莫茲為大本支既茂基祚益安是故百男
昌而周興五宗強而漢熾隆替之源古今一揆中謝
伏惟 尊號皇帝陛下純孝奉先遠猷垂世錫類之
祉久屬羣心皇穹降休誕啟茂緒蓬矢遵吉牢脩具

儀斯實宗廟眷佑之靈眾庶無疆之福窮河濟海聲
教所需儻曰有心率茲相慶况臣職叨近署位備列
藩竊聆嘉喜奚勝踊躍官守有繫阻遠闕庭臣無任
瞻天望聖蹈舞屏營之至

賀降皇子表

韓魏王

臣某言伏覩進奏院報皇子降生者穹昊垂休元良
載誕累盛之期增赫輝之采采光凡在幅員率同慶
躍中謝伏以 皇帝陛下睿明正統兢翼凝猷紹三

后之丕基覽八統之洪緒旰宵求治勤儉化民果聖
嗣之寔昌示璿源之滋衍吹銅導氣式協于嘉辰齒
胄從師即成于懿德永扶天業克耀儲闈臣恪守窮
邊竊聆熙事預班朝之列莫趨交戟之嚴輸就日之
誠徒効傾葵之意臣伏限官守在遠不獲蹈舞闕庭
臣無任云云

賀降皇子表

樓大防

尊居慈宸方均萬國之歡慶篤神孫益衍四朝之盛

宮闈喜溢海宇恩深中賀竊以漢甘露中嘗有甲觀
命名之愛唐開元際亦稱三日臨深之儀曾未有視
黃屋以非心見綠車之載育恭想天顏之悅咸欣帝
系之昌恭惟尊號太上皇帝陛下道體純乾功參
太極傳神器而與子為天下而得人仁聲素洽于編
民福祚遂繇于世嫡克岐克嶷含飴自適于聖情曰
壽曰康戲綵愈隆于色養臣曾從屬車之後遙瞻持
室之嚴奏未央五日之朝阻陪下列效嵩岳三呼之

祝徒罄微衷

賀降皇子表

樓大防

天啟昌期方侈三宮之慶國生元嗣實隆億載之基
溫詔四馳驩聲一律中賀竊以本朝之傳列聖古所
未聞長嫡之出中闈今方再見况五世高曾之上壽
當三朝揖遜之盛時首開長發之祥益茂無疆之祉
恭惟皇帝陛下仁霑動植德冒華戎堯帝聰明既
親于九族周家忠厚宜見于百男爰稽熊夢之占允

協燕祥之吉事關宗社喜浹穹祇臣頃玷從臣幸休
真館拜殿陞之名表莫綴駕班誦朝廷之德音敢同
鰲抃

賀降皇嫡孫表

洪圖錫羨卜年過蒼籙之期朱邱發祥奕葉啟綠車
之慶事關廟社喜極神人中賀恭惟 皇帝陛下襲
積累之休撫靈長之運惟邦國之盛事曠古昔以希
聞尊拱帝堯揖遜相傳於帝舜德隆文子繼承又見

於文孫兩宮之第祿朋來四世之嘉祥坐閱臣溢叨
分委獲覩榮懷光動尾躔灼見天心之默祐歡形足
蹈不勝臣子之至情

賀立皇太子表

曾文肅

元良定位正統宅安大協三靈之和仰增七廟之重
中賀竊惟順天心而與子由三代之公貳宸極以升
儲則萬邦以正發聖謀之獨見定炎曆之重熙慶號
所孚羣生有繫恭惟 尊號皇帝陛下本湯迪哲體

舜用中禮樂政刑邁百王之風采孝仁聰睿迪四聖
之神明謂寶命之重而謹於承祧謂天下之大而先
於正本長子在震宜主鬯之所符大人於離斯重明
而有繼發前星之象緯基萬世之本支臣假守侯藩
阻趨天闕

賀立皇太子表

誕揚休命肇建儲闈上當天心下愜人意照臨所逮
鼓舞攸同中賀竊以自昔熙朝必崇元嗣謹承天之

序所以示百王之公嚴問寢之經所以教四海之養
舉茲盛典屬在昌辰恭惟 皇帝陛下降陟紹天憲
章復古治效光乎簡冊德馨達于昊穹周格眷懷備
膺報貺錫多男之丕應既已彰帝命之符隆主器之
上儀又將固天下之本惟聖心之獨符致海宇之均
休臣積受國恩久塵法從仰前皇之炳煥愈知北極
之尊振喬岳以歡呼永祝南山之壽臣無任

賀立皇太子表

王禹偁

禮崇儲副澤被華夷凡在含生罔不同慶臣聞帝王之道步驟殊途夏后所以傳家垂諸古典姬昌之為世子載於禮經皆所以定人心而固國本矣由三代而下寔百王不刊洎乎唐室豆分梁朝草創莊宗則席未遑煖明宗則日不暇給繼綿五姓戰伐五年重念春坊遂成闕典我太祖神德皇帝揖讓神器司牧黎元擇上聖之才副下民之望人神允屬獄訟攸歸伏惟 至尊號皇帝陛下傳自日兄升為天子德化

威服垂二十年文物聲名盡合經義禮樂征伐不自諸侯始求主鬯之親用正副君之位斯孟子所謂天與賢則與賢天與子則與子者也伏以 皇太子生知忠孝性稟溫文允符當璧之祥宜正撫軍之重筮龜協吉簡冊增輝而又舉滂雷之聲因而作解導少海之潤用以滌瑕必由舊章降此大賚綸綍四出狴牢一空率土普天不勝慶幸臣出官禁署承乏方州目不覩朝廷之儀手不當文翰之職雖違素望實偶

昌期伏限郡政不獲奔詣天闕臣無任

賀立皇太子表

范堯夫

雜明有繼震器攸歸正朔所加歡愉遐暨中賀臣聞
遂古以降謳歌或尚於歸賢逮夏而來歷數丕承而
與子恭惟 皇帝陛下憲天立極體道宅師以謂下
武繼文有以終光華之運唐堯授舜使之繼魏蕩之
勲爰因冢嗣之良肇峻青宮之誌問安視膳日滋孝
友之聲監國撫軍允係天人之望璇源䟽衍烏亦靈

長臣限守方州久叨睿睠阻趨丹陛徒溢深衷

聖宋名賢五百家播芳大全文粹卷三終

聖宋名賢五百家播芳大全文粹卷四
表

駕幸河北起居表

楊文公

臣某言今月八日得進奏院狀報去年十二月三日
御札取五日車駕暫幸河北者毳幕稽誅鑿儀順動
羽衛方離于象魏天威已震于龍荒慰邊氓後后之
心增壯士平戎之氣臣某中謝臣聞涿鹿之野軒皇
所以親征單于之臺漢帝因之耀武用殲夷于兗醜

遂底定于邊陲五材並陳蓋去兵之未可六龍時邁
因犯順以必誅矧朔漠餘妖腥膻雜類敢因膠折之
候輒為烏舉之謀固已命將出師擒俘獻馘雖達名
王之帳未焚老上之庭是用親御戎車躬行天討勞
軍細柳之壁巡狩常山之陽師人多寒感恩而皆同
挾纊匈奴未滅受命而孰不忘家行當肅靜塞垣削
平夷落梟冒頓之首收督亢之圖使遼陽八州之民
得聞聲教榆關千里之地盡入提封蛇豕之穴悉除

干戈之事永戢然後登臨瀚海刻石以銘功陟降雲
亭泥金而展禮逮追八九之迹永垂億萬之年臣忝
守方州莫參法從空勵請纓之志慚無扈蹕之勞唯
聆三捷之音遠同百獸之舞臣無任云云

行在起居表

田表聖

臣錫言今月十五日遞中伏覲御禮以逆胡犯順大
駕親征法天道之運行舉王師以薄伐百臣受職二
儀儲祥風霜助肅于皇威金玉必真于聖裕臣錫伏

限所守不獲扈隨

北郊清城起居表 代皇子

汪彥章

輿衛天行親講頌祇之禮臣工宿戒交修扈聖之儀
當解愠之清和宜儲精之晬穆恭惟 皇帝陛下接
千歲之統合三神之歡膺多福以履至尊舉祲威而
明德意肇修陰祭哀對坤靈千廬星列於壇場萬騎
雲屯於次舍協氣旁達祥光上浮臣方習幼儀莫陪
顯相嘉與函生之類共憑持載之安遙企威尊惟深

慶抃

北郊清城起居表

函鍾八變將修大祭之儀陞戟百重密警周廬之衛
舉典容而創見殫誠物以駿奔恭惟 皇帝陛下道
與時升禮由義起謂一郊二祭之合非三代六經之
傳弗謂屬車之勞躬臨方澤之祀壇垓在望籩豆告
陳蠖蕩深思豐融來應臣屬當齟齬莫侍冕旒徒瞻
晬穆之光無補肅雍之相

車駕親征起居表

趙德莊

靈旗杓指誕揚北代之威戎輅天臨式慰中原之望
儼百神而受職拱方岳以來朝恭惟 皇帝陛下淵
嘿坐謀乾綱立斷神武不殺初何意於勇功天罰恭
行實有開於駿命虜為不道古所未聞久敷德以示
懷終阻兵而棄信詔聲厥罪人奮其忠方三捷以系
傳宜一征而底定舉上郡元封之役親屈帝尊踵澶
淵景德之行用光祖武清塵所扇時雨自霑臣猥假

藩符阻陪羈勒仰民獻十夫之翼雖媿壯圖晞太平
一士之功猶知謹守

車駕親征起居表

汪彥章

萬旅戒嚴六蜚巡狩法成周之時邁遵大漢之天聲
恭惟 皇帝陛下誠貫神明資兼智勇合羣英之策
慮興中否之基圖念問安猶隔於雞鳴豈撥亂得辭
於馬上姑從簡約用始憂勤臣方遠闕庭莫共牧圉
神戈所指方令裴度以眎師清蹕之行將獲呂嘉而

名縣

車駕回鑾起居表

皇威烜赫方望幸於中原聖孝寅恭暫歸承於清廟
民有雲霓之慶師無霜露之勞恭惟 皇帝陛下開
濟艱難圖回久大尚勤寶儉來天佑於清躬惡殺好
生養國祚之元氣昌期將啟狂虜自夷時乘六龍淮
海風動日闢百里豪傑景從適安祀以言還因薦勲
而飲至格于藝祖聊收虞守之常作我上京終復漢家

之舊臣義均國體喜若己功簪橐坐踈雖媿甘泉之
從衣冠未挂猶瞻清渭之朝

車駕巡幸起居表

方仁和

六師雲陳共圖敵愾之忠萬乘天臨親示拊循之旨

王靈敷暢士氣歡騰 中賀 恭惟 皇帝陛下孝本親

親功超將將思父兄之播越軫吏士之勤勞露沐風
纒共濟艱難之業雷驅電掃託收嘉靖之勲臣叨守
藩符但參羈勒四方來賀願陳下武之詩二聖重歡

仁勒中興之頌臣無任

車駕巡幸起居表

汪彥章

素秋既杪人欣萬寶之成滄海方澄地接三山之邃
恭惟 太上皇帝陛下獨觀昭曠高蹈希夷凝宇定
之光藏雷聲於淵嘿玩味瓊笈逍遙藥宮神靜身
修既得廣成之道年豐粟熟益知姑射之神臣等夙
侍清光叨陪太政莫執問塗之役唯瞻窳極之尊

車駕巡幸起居表

年運而往天時俄及於凜秋日舒以長物外方觀於
浩劫恭惟 太上皇帝陛下研幾繫表探蹟寰中既
與夫造物者游孰肯以天下為事遺元珠於赤水久
矣相忘飲膏露於金莖自然難老臣等幸參法從嘗
侍清光徒傾就日之誠莫遂瞻天之意

請車駕東封表

趙承之

雲霄高遠未獲感通螻蟻賤微尚懷悃悞罔避再三
之瀆冀申萬一之情 中賀 臣等竊以天至尊而不可

違民甚愚而不可抑王者之德既當於天意聖人之澤又決於民心和氣發於休祥歡聲播乎嘉頌福固難於專饗誼必思於有尊蓋欲歸功於皇天所以從事於喬嶽文皆經見學亦世傳故孔子著柴望之儀以紀唐虞之常道而王通昧封禪之理乃謂秦漢之侈心方當黜異說以崇大猷莫若修盛典而示德意恭惟 皇帝陛下堯仁舜孝文德武功論極前王之所未嘗政皆近古之所不到有四海之面內無一夫

之向隅意所欲而動必成心無求而福自至昭然顧誕之命煥乎錫予之符超河圖而軼洛書昔皆無有發石室而探金匱史不能名治固莫盛於此時神亦有望於今日所以兆人昭合百辟僉同爭獻長卿之文願上俛寬之壽以謂接千歲之統安可絜三神之歡紛然陳義之高殆若後予之怨雖聖懷謙損方且深闕於俞音而靈况昭明無乃久稽於眷命伏願 皇帝陛下改容有穆出詔惟溢不憚陟嶽之勞毋重

省方之遠揭虔燔燎報施堪輿東方謂諸侯之朝南
面受羣臣之賀屬車八十一乘獲望清塵祥符一百
七年再觀盛事民所願也天豈違之臣等咸以非才
並當所部採忱辭於多士察眾志於編氓與其坐壅
塞以貽譏不若緣冒煩而得罪神堪致薦雖自愧於
蘋蘩日儻回光尚庶幾於葵藿

請車駕東封表

趙承之

帝德昭明功既成而必告天心惻怛民所欲以斯從

敢傾有眾之情願達蓋高之聽目瞻雲日足蹈冰淵

中賀

臣等切伏里閭究觀載籍禮盛者其文必縟施

豐者其報必崇故王者謹於事天而聖人乃能饗帝
時薦犧牲之潔歲陳珪幣之嚴至於膺不世之殊休
則必舉非常之茂典推因高之義而即介丘之遠竭
報本之志而躬夙駕之勞蓋稀闕之上儀實太平之
盛節然相望者萬有千歲而可紀者七十二君道不
虛行時若有待恭惟 皇帝陛下體堯蹈舜跨商越

周躬膺歷數之歸天縱聖人之略一心紹述孝弟通
於神明萬物阜安忠厚及乎草木兵與刑而不試禮
槩樂以咸興戎狄奉贄以守藩夷貊挈國而請吏農
有常豐之歲士無不養之才故得人和而天瑞臻神
况而地寶出圖書炳煥象類昭明極名數而無以該
罄竹帛而不能紀茂惟天意具迪民衷鋪觀赫赫之
祥灼見諄諄之旨所以西踰邠鄘東越龜蒙周人既
願於升中魯國尤深於望幸眷此商韋之舊素聯畿

邑之尊日月曬光最先瞻覩雨露流潤罔不函蒙惟
祥符檢玉之年實真祖駐蹕之地屬車再至黃屋少
留精舍有嚴尚錫雲封之號脩塗不改猶遵輦路之
餘臣等所以爭倒衣裳競傾葵藿稚子不知其舞蹈
耆年願濟於須臾冀聞謁款之音舉獲後來之慶伏
願 皇帝陛下仰承帝謂俯詢輿言崇祀之闕規
抑撝謙之高行消辰誕告先日戒期命掌故以修方
詔秩宗而考禮稽特巡於虞典則先至者岱紹祖武

於章聖則用事者東渙百執以駿奔儼六龍而順動
登封降禪並交天地之歡發政施仁咸錫臣民之幸臣
等冀緣清道獲望咫尺威儻鳴鑾之整聞故填壑之無
憾正憐此日方馳海上之思猶喜異時無復周南之
歎

請車駕西祀表

邵澤氏

天意溥臨人心協應願講親祀之禮式昭報本之規
輒露封章仰干宸聽

中賀

臣聞自古在昔若聖與仁

因地因天以祭以祀蓋乾坤之合德宜父母之並尊
惟彼柔祗實專厚載修祠漢室卜宅魏睢出鼎騰光
允矣后皇之靈迹泛舟鼓擢偉哉孝武之勝遊我國
家臻至治於祥符闡鴻徽於章聖遠紆法駕躬奠黃
琮玉匱金繩禮全掌故重輪紫氣事載信書間有餘
民能言往躅頌長春之舊境乃馳道之通衢梵宇深
嚴永留玉座飛橋連屬常錫重名念此彌文且成曠
典理若有待遭之甚難恭惟 皇帝陛下當制禮作

樂之時撫重熙累洽之運天臨海宇子育黎元成功
不居修報有自是以兼隆二至之祀遠追三代之英
感通神明昭格上下神降祇出未之前聞瑞應祥臻
其可勝紀伏願 皇帝陛下即封嵩岱即款河汾歲
事靈壇侑饗烈祖盡吉蠲之孝享罄明察之誠心然
後錫福萬民垂休永世面方岳以朝羣后覽道俗而
問昔年駐輦蒲津光動倚天之樓觀回鑾函谷雄觀
亘地之山河臣逖遠闕庭叨分符竹俯殫悃幅深冀
允俞望屬車之清塵敢効前驅而首路見甘泉之法
從庶幾願畢於此生

請車駕幸洛表

趙承之

天地之德螻蟻莫不願忠鑾輅所臨臣民以為至幸
情甚眾以難抑聽雖高其必從敢冒昧於譴訶冀露
陳於悃幅竊以成周舊宅不改山川有宋別都具嚴
筦鑰土最中於諸夏日尤近於長安當開寶立極之
初六飛天降迨景德承平之後萬乘雲從草木尚被

於休光父老猶談於盛事禮曠焉其斯久民望之而甚勤趨修厥章宜在茲日恭惟 皇帝陛下盡循堯道丕顯文謨力追三代之純躬軼百王之盛治無細而不舉功有難而必成薄四海無障候之虞環九州皆冠帶之域載惟立愛尤切奉先南面而朝感春秋霜露之降西風所暨念祖宗弓劍之藏既出綽以戒期將消辰而展事陵園動色如喜翠華之來京邑相趨咸願屬車之覩而况闕宮肅設儼列聖之睟容禁

宇崇成煥中天之寶構宜暫勤於乃頌庶深慰於斯民伏願 皇帝陛下俯照忱辭仰開睿聽既竭孝思之奉特迂輦路之臨觀四后以省方御三川而問俗靈河達砥柱之險遠懷有夏之功溫洛通汴水之波遙念元豐之績臣等幸承官之獲採輿言冀聞清蹕之音得効前驅之役庶幾洛下共償此日之心遂使周南無復昔人之歎

車駕移蹕臨安府賀表

汪彥章

涓日上春移都近甸用虞書東狩之禮示魏闕西歸
之期國步寔康人心胥悅竊以用永地于新邑盤庚
所以靖民會諸侯于東都宣王由之復古不有真王
孰恢遠圖恭惟 皇帝陛下清明在躬彊勉行道自
寇戎之薦入為宗社之深憂側身修行而志極于艱
危菲食卑宮而力圖于興復始遊襄野卒然雖假于
問途旋駐岐山從者有如于歸市既天心之悔禍宜
宇內之休兵將返舊京先移清蹕越濟江而北渡御

方岳以中居臣蚤扈時巡適嬰郡寄入闕建策莫輸
戍卒之忠望日馳誠徒喜長安之近

羣臣上皇帝勸發表

汪彥章

天命有歸將嗣興于景運人心胥悅咸暱就于至仁
雖昧表之非遙猶鴻稱之未正辱居近列殊震危衷
伏念臣叨受國恩早居法從方百六朝廷之厄會偶
二三輔弼之無人猥以庸虛參其謀議旋屬敵情之
變遽成天步之艱二帝出郊既蒙塵而不返九祧之

祀將攝裸以為名所宜引死以力爭顧獨包羞而苟
活生雖可恥志則甚明蓋天下屯危方苦存亡之未
定而古人事業惟觀濟否之如何使生靈相顧以無
歸雖溝瀆自經而奚益輒慕周勃安劉之計庶伸程
嬰存趙之忠儻奉真人光膺神器嗣一祖八君之傳
序慰四方萬里之謳吟誓仗歐刀敢煩司敗幸率土
相從而歸啓且諸侯不輟以事周雖國鴻休實臣素
志頗假須臾之死前瞻咫尺之威伏望 皇帝陛下

中奮英明外符信順受圖高邑之壇趣駕未央之宮
盛九賓之禮以見羣臣輯六獻之儀而朝清廟時方
多故幸少留黃屋之心臣既無功願自謹清宮之職

羣臣上皇帝勸進表

汪彥章

天人同心方嗣興於有德宗社重事可久曠於常尊
雖懇欵以樂推猶逡巡而牢避凡茲俟命安可厝躬
恭惟 皇帝陛下識照幾微誠參化育早毓神明之
胄茂昭文武之英有開必先既獄訟謳歌之畢往惟

德是輔將神祇祖考以咸安當承再造之休乃守一
謙之益三靈交鬱四海疇依惟聖人所貴於因時凡
天下莫先於定分今九廟尚虛於裸獻兩河未入於
輿圖繼體守文當亟收於眾後宅中圖大宜深究於
遠圖倘差一日之幾孰啟千齡之運伏望 皇帝陛
下俯占輿誦光御法宮蒞中國而撫四夷履至尊而
制六合雖以位為樂非堯帝之本心然其命惟新蓋
周邦之舊物瞻威在望得請為期

元命日百官乞詣寶籙宮行香表

汪彥章

天佑民而作之君宜膺備福臣歸美以報其上冀効
微忠洊輸悃悞之辭未動崇高之聽故同眾志再冒
嚴威臣伏以至人無名豈陰陽之能制大德必壽蓋
臣子之願然矧逢基命之辰茂集紀生之慶眷惟吉
壤夙有殊庭標祕籙之新名會叢霄之真馭當肅朝
紳之列就增神筴之期閱六十日之回旋時焉致款

祀億萬年之綿遠意則無窮茲受戴之常情非寅恭
之過禮敢圖睿聖固執謙虛謂將仁壽以同民不欲
福祥之專已仰戴乾坤之大益深淵谷之危未賜矜
從若為退聽伏望 皇帝陛下俯垂淵照曲徇羣情
許令承學之徒或遂增高之算雖華封至賤祈年屢
辱于堯辭然莊語可稽受命終期于堯獨

請皇帝罷謁太廟第一表

王禹玉

竊覩詔下太常以九月十二日于大慶殿行恭謝天

地之禮前一日詣太廟者伏以王者及物始之報而
迺享于帝聖人極孝思之隆而又配以親然禮備者
文必昭誠至則體或簡屬因事時而展事敢緣變以
錯宜恭惟 皇帝陛下迪畏天明紹休聖業比勞獲
獲之慮至爽節宣之和旋萬靈之隕祥甫皇德之凝
粹適修三歲之祀更用季秋之良合丘澤之牲雖即
明庭之薦執圭璋之灌尚躬太室之行且天地念生
民之深時則錫九宸之福維祖宗懷繼統之重豈欲

殫大輅之勤况哀兩儀之臨陟三后之對足以陳黼
冕之美達霜露之悽倘精意之上交固禮文之旁適
臣等參持近柄預講祫儀復齋戒之辰願儲神于禁
幄覲清明之宇宜收蹕于天衢仁可淵衷同符羣聽
請皇帝罷謁太廟第二表
王禹玉

近嘗拜章以大慶殿將行恭謝天地之禮乞罷前一
日謁太廟者伏以升燎于壇既節徂郊之禮奉璋于
室宜財假廟之文俞音未回羣聽猶鬱恭惟 皇帝
陛下膺純耀之烈撫休明之期蓋神勞萬務則氣或
盪和以德交三靈則福亦旋感念保綏于鴻業思昭
謝于高穹迺涓路寢之車以象圜丘之享粢盛方潔
璧玉華光方將陟配三后之靈導迎上帝之貺茲誠
為人子者孝之盡有天下者報之隆今復馳齋蹕之
戒祗太室之薦竊恐霧露之氣涉于宵衣輿馬之音
震乎天部則非所以承祖宗之愛來邦家之休臣某
等冒乘化均獲司熙典謂文之所損在于適時之變

且事不敢勉誠以愛君之深冀專並侑之虔願弭先
期之謁倘孚眾欲是契天心

請皇帝罷謁太廟第三表

王禹玉

近再露章以季秋吉卯皇帝恭謝天地乞寢前一日
謁太廟之禮未降俞音者伏聞三歲然後卜郊惟王
者能類于帝七廟所以觀德惟聖人能享其親然禮
之鉅者古或異行文以減者今容參當倘循時變之
適未參君德之休恭以 皇帝陛下躬上主之姿接

千齡之統履天下之重器統天下之劇綱深拱壇廟
之居獨垂寥廓之聽比積勤之千裕旋歛福而就寧
適涓季商以肅廣殿視天道之備則嚴大報之修推
聖孝之隆則沿並侑之舉迺先庚之詔于薦太宮以
未明之期爰飾齋輅出中采齊之節躬服大冕之章
且執豆駿奔尚虞獻力之跋而登歌拜俯靡勝竣事
之勞况初迪皇躬之和寢攬邦務之決臣某等是以
入奉清燕具陳三后垂愛之深退節禮文并上先王

制事之中合猶六飛調于天御萬衛詔乎君行豈講
劇之未精曷謙畏之靡答伏望 皇帝陛下收羣策
之慮回至德之聰謂犧象之獻不及周則可以舉攝
事之典謂霜露之感無以達則豈不對肇禋之筵冀
念承基之難終留格祖之進若然則神晻藹而來顧
氣嘉美而下游豈特昭丕事之成實亦順羣生之望

請加皇帝尊號表

王禹偁

内外文武臣僚具官趙某等言今月二十一日共干

天聽別于尊名奉宸翰以未俞慮精誠而不至戴天
就日猶懸億兆之心伏閣叫闈寧避再三之黷中賀
臣等聞運行四時者惟天之日照臨萬國者惟日之
明天不宰其元功而有蒼旻之號日不耀於陽德而
有畏愛之名是以居廣大而罔辭處貞明而弗讓蓋
功德著于上而名號隨于下矣前王後聖茂實英聲
取譬于茲其則不遠伏惟 皇帝陛下繼天而王如
日之升靜則垂堯舜之衣裳動則仗武湯之旒鉞明

堂制禮走玉帛于萬方宣室崇儒煥文章于三代候
氣而八風從律陳詩而萬物由庚既理定以功成尚
宵衣而旰食早以兆民愛戴羣后推崇率由舊章共
上徽號 陛下讓不得已俯而從之雖百姓同懽方
諧歸美而一人善下終恐近名昨者法天道以流謙
敷王言而如綽謂大道不器何假先天之言謂聖人
無名豈須惟睿之說盡除 尊號頗駭羣情臣等奉
詔靡遑再章請復 陛下過防滿假終本允俞守謙

卦之六爻動而無悔去湯書之七號卑不可踰遂使
中外包羞軍民沮色既難移於成命乃別獻于嘉猷
共傾天誘之衷用紀日月之德著龜協吉蠻貊同文
咸願聽卑以期得請 陛下特迂鳳藻猶避鴻名固
愈振于謙光奈重違於人欲而况皇王顯號今古彝
章上則尊列聖之貽謀光輝七廟下則稱庶邦之係
望威服八荒凡在含生共觀休烈豈可執勞謙之小
節廢立極之大名居軒昊之至尊慕巢由之獨行此

臣等之所未諭也 陛下之所不取也臣等不勝大願敢固請上 尊號曰 法天崇道文武皇帝庶得將順謙冲之旨惟新徽懿之名勉使聖朝有茲闕典跼天踏地罔敢自安碎首糜軀期于必遂臣等無任區區懇迫之至

請加尊號表

揚大年

文武百僚南郊大禮使具銜臣呂某等與內外馬步請軍將校僧道耆壽等謹詣東上閤門再拜稽首上

言曰臣等一昨體上天之顧諟採萬國之謳歌願增益於鴻名用昭彰於盛德再三之瀆已負於刺芒億兆之誠彌堅於仄席遽頒明詔未賜允俞朝野之間啟處無措臣某等 中謝 臣等伏以字之曰道蓋出強名何言者天不聞讓德佛惟大覺美號有百億之殊君乃至尊徽稱兼三五之盛若夫聖神之冲粹高厚之儀形非可管窺甯容臆度出於愛戴成此勤拳是故王者懋建大中戴稽古訓握河洛之祕紀所以愛

天之明順黎獻之歡心所以從人之欲略鳴謙之小節收輿誦之至公雖屈己以無辭誠當仁而不讓者也恭惟 尊號皇帝陛下祇荷丕構茂宣重光法人文之化成體神武之不殺惟睿作聖有感必通居上克明無幽不燭泣辜扇暘示仁愛於羣生潔粢豐盛展孝思於九廟躬帝皇之能事掩載籍之前聞而復探妙道於域中敷至德於天下味希夷之旨允契混成挺高明之資雅敦柔克極妙有玄元之理彰務滋

邁種之勤度越古今克格上下故羣情之懇倒述二美之形容願以大猷著於徽號而 陛下固形冲挹猶鬱耿光莫高匪天徒懷跼蹐無私者日未賜照臨况郊祀有期方國咸在圮嘉壇而款太一宜昭答於神休奉灌鬯以見祖宗合紹隆於先志苟違遐邇之請曷副人祇之心臣等不勝勤勤懇懇取固上 尊號曰崇文廣武應道章德聖明仁孝皇帝伏望 陛下對越景靈祇膺純嘏特詔執事誕舉彝章以仲冬

南至之辰天正上元之節畢禋燔於吉土覃渙汗於中區端拱穆清備物典策追九皇而比德與三辰以交歡快華夷僂望之心成宗社無疆之慶臣等幸甚天下幸甚謹奉表陳請以聞臣無任

請加尊號表

揚大年

臣某等言臣等稽合人謀形容帝德願益龐鴻之號仰酬亭育之仁罄華夏之一心奉表章而四上仍降明詔未賜允俞遐邇之情殞越無措臣某等中謝臣

等竊窺舊史載考前言夫名者實之賓蓋名不可浮於實號者功之表非號何以明其功天地以不宰為先猶述高明厚載之大德堯舜以無為而治亦著重華放勳之美稱恭惟 尊號皇帝陛下祇賀慶基誕敷駿德臨下以簡視民如傷舞干羽以示懷柔卑宮室而訓恭儉作事必咨於龜筮乃至大同考言爰及於芻蕘克彰好問體玄元之清淨法夏后之聲身至孝蒸蒸所以奉先而尊祖小心翼翼所以君國而子

民懿鑠薄將溘熙光大是以由中及外不謀而同咸
以為 陛下總妙道於無方敷明德於有截思範圍
於休美用訢合於神祇蚩蚩之氓諒亦知于帝力巍
巍之號固上契於天心而 陛下載執撫謙未俞誠
情忽邦家之大典忘祖宗之舊章况今祇事紫壇躬
謁清廟四夷助祭知中國之有聖人羣后在庭見明
堂之坐天子羽儀文物之震耀粲盛拒鬯之吉蠲三
靈交歡諸神受記盼蠻昭答戩穀具膺豈可徽懿之

名簡略未稱矧復雷雨渙汗肆青於九垓玉帛駿奔
侍祠者萬國咸欲謝生於蒼昊歸美於穆清亦願覩
冕旒之當陽觀典策之備物而陛下曲矜小節深抑
大猷荷上帝之眷懷乃重違其成命為蒸民之司牧
反固拒其歡心此臣等所以冒齊斧以上言伏蕭屏
而俟報者也是敢不避萬死謹固上 尊號曰崇文
廣武應道章德聖明仁孝皇帝伏望俯從眾欲式昭
德音干犯宸嚴必期得請臣等無任

請皇帝御正殿表

晁无咎

徒傾葵藿之誠敢期回照未竭潢汙之滴尚或可羞
矧變異之已消尤故常之當復中謝恭惟 皇帝陛
下法禹罪己繼文小心惟五事之罔愆於三光而何
累爰以朔旦自興重雲不用其行史前占於必蝕增
修於德人莫覩其盛虧和足致祥順宜獲助而猶謙
尊自牧震虩靡寧雖天所以愛人君常欲制於未亂
而王所以奉天道故當懼於無災然與其戒居處飲

食之安孰若擴視聽猷為之善豈惟過也見而更也
仰是謂應以實而不以文南面宅尊達四聰於虞舜
大庖日御綏五福於周成度或聽卑終聞詔可

請皇帝御正殿表

汪彥章

乾象垂精稍拂清臺之候聖心祇戒久稽路寢之朝
既稷沴之潛銷猶彛儀之未復凡居覆燾孰不怔營
恭惟 皇帝陛下光紹祖宗丕膺歷數萃勤儉於一
已濟艱難之百為雖功如堯舜之巍巍與天同大然

心體文王之翼翼無日不恭比緣象緯之愆昭示國
家之戒皆臣子素餐之過何聖神軫念之深乃遷黼
座之尊退避法宮之正損厥奉御出於精誠然百辟
晨趨宜肅乾坤之位四方秋請願瞻日月之光倘降
次以自居則在庭之安仰伏望 皇帝陛下時回淵
鑒俯徇誠祈稱警蹕以出房垂衣裳而當宁向明而
治合禮之宜不惟安羣下之情抑以答高穹之意

請太皇太后受冊表

曾文昭

朝廷盛典久抑而不施臣子微誠已殫而莫聽雖自
謙冲之有素亦由控告之未孚敢辭冒瀆之再三所
冀矜從之萬一中謝伏以 太皇太后陛下紹承天
命保佑皇家粵正尊名誕膺顯冊茲蓋有邦之彛規
是惟列聖之通規而况 太皇太后陛下聰明並於
唐虞功德高於任姒納生靈於福壽措社稷於安疆
事天治民內盡憂勤之念克己復禮動懷抑畏之心
前詔牧司勿言徽稱退託不德絕迹外朝事皆賤於

故常道以超於古昔頃示責躬之變暫停備物之儀
至誠感通靡俟旋日膏澤優足不盈崇朝麩麥豐登
禾稼茂遂家有坻京之望人無溝壑之虞變頌感為
歡聲化凶饑為樂歲是宜因民之願享帝之休舍已
從人展窠錯事而猶逡巡自抑避避弗居違兆姓之
心挈三神之望何以答塞順氣慰安羣情伏望沛發
德音勉循舊典備金石之奏御雲龍之庭極治世之
彌文成聖王之能事一人有慶永符四海之歡萬壽

無疆長享三牲之養臣無任

請車駕幸祕書省表

呂伯恭

東觀書林久俟漢儀之覩西崑冊府載瞻周馭之臨
嗣三紀之閱模軼百王之盛節中賀竊以斯文崇替
與世降升自我祖宗闢載籍萃藏之地于時典冊踵
乘輿游幸之書從容箴誨之求廣大峻良之聚炎圖
再造華省一新爰親御於右文用仰繩於前武重明
善繼太極丕承乙夜牘陳念初載網羅之不易斯朝

班入思中興儲養之有原迺臨三館髦俊之躔乃辰
列聖圖書之奧帝暉下矚光汗牛充棟之藏天藻昭
垂跨駟馬柏梁之詠湛露示醇醲之惠承雲宣純繹
之音一日萬幾曾靡齋居之暇九流七略獨煩清蹕
之留蓋以恢古尚德之風夫豈為飾治樂成之舉聲
明布濩慶賜汪洋恭惟 皇帝陛下秩序邦經裁成
王度多聞將求建事既留意於簡編大烹所以養賢
復均盼於肴醴士心興起雅道流行臣等服在具條

身逢昌會第從臣之頌敢揚屬於鴻休近天子之光
請具宣於德意臣無任

請車駕幸太學表

蘇子瞻

輦回原廟既崇廣孝之風幄次儒宮復示右文之化
禮行一日風動四方中賀臣聞五學之臨三代所共
蓋天子不敢自聖而盛德必有達尊在漢永平始舉
是禮雖臨雍拜老有先王之規而正坐自講非人主
之事豈如允哲退托不能奠爵伏興意默通於先聖

橫經問難言各盡於諸儒恭惟 皇帝陛下文武憲
邦聰明齊聖大度同符於藝祖至仁追配於昭陵乃
舉舊章以興盛節臣早塵法從久侍經幃永矣馳誠
想聞合語於東序斐然作頌行觀獻馘於西戎

賀車駕幸太學表

濟濟多士靈承上帝之休雍雍在宮服膺文母之教
風傳海宇慶溢臣工中賀臣聞學校太平之文而以
得士為實經術致治之具而以愛民為心心既立而

具乃行實先充而文斯應永惟坤載之厚輔成天縱
之能惟使文子文孫莫不仁故於先聖先師無所愧
恭惟 太皇太后陛下憂深祖禱德燕孫謀黃裳之
文斧藻萬物青衿之政長育羣材豈惟鼓舞於士夫
實亦光華於史冊臣冒榮滋久被遇最深外告成功
行喜鴉音之革中修潛德孰知麟趾之風臣無任

賀車駕幸太學表

石敏若

三千壁水教自國中萬里蜿旌采從天上升階奠爵

而蒐舉陸典橫經賜坐以光輝諸生自然草靡而風
從孰不鳶飛而魚躍中賀竊以增負廣舍自漢而下
莫如唐養老乞言由堯以是傳之舜削畫餅虛名之
科舉惠羸粮往學之衣冠在太平時皆盛德事前古
蓋嘗有意卒無成功元豐未暇盡行留待今日恭惟
皇帝陛下與天無極如日之升謂命鄉論秀告於
王而化民成俗必由學夙嚴葆衛祇謁儒宮有司洒
道以清塵觀者駢肩而累足雲開東幄降黃屋以親

臨鷺集西靡望翠華而再拜士氣鼓舞歡聲涌泉豈
特夏曰校而周曰庠矢其文德將使戎在西而狄在
北懷我好音臣目覩天書心存魏闕起太史滯留之
嘆嘉會難逢獻周壽考之詩道人未出

請重明節表

文武百僚特進左丞相許國公臣周某等上表臣等
言伏以飛龍在天方仰君臨之德流虹繞渚實開聖
作之祥宜紀昌辰用昌盛際中謝恭惟皇帝陛下

承謨丕顯受命溥將致養三宮備本朝之家法參決
萬務得率土之民心正以俯臨積陰頓解於赫明離
之象益暉出震之時臣等不勝大願請以九月四日
為重明節伏望 皇帝陛下俯察羣情亟頒俞旨施
高明建顯號侈穹昊發祥之期披皇圖稽帝文伸臣
民歸美之報著之令甲付在有司邦家增光天下幸
甚臣等無任

請重明節第二表

臣等言近上表乞以九月四日為重明節伏奉批答
不允者受命若帝之初宜邦彛之具舉盛德如天之
覆豈人欲之或違比罄忱辭願標令節未回聰聽曷
副羣情臣等 中謝 伏以紀千秋之名雖曰唐舊允長
春之請則在宋興况今非止循累代之成規蓋以侈
重華之大慶顯號缺而未講盛旦鬱而弗彰謙雖益
光理或未稱伏望 皇帝陛下茂昭鉅典亟發德音
漢殿尊榮親奉玉卮之壽周行拊蹈各陳金鑑之書

豈惟光簡冊之傳實以副天人之望臣等無任

請重明節第三表

臣等言近再上表乞以九月四日為重明節伏奉批
答不允者淵聽未回確爾執謙之意忱辭游協歎然
歸美之誠彛典不可以久稽眾心不可以屢拂敢控
喁喁之請再干穆穆之光臣等中謝竊以民之戴君
自古有訓禮之飾治後世尤詳惟大德得其名故因
誕彌而紀節雖先王未之有亦容增益之隨時當渚

虹樞電之辰受岳貢川珍之集乃同常日夫豈人情
今日博士議即固執於廷秩宗奉常各揚其職必期
得請疇敢自安伏望 皇帝陛下聖度兼容大明委
照帝辭三祝足昭挹損之懷臣同一心終冀允俞之
命臣等無任

聖宋名賢五百家播芳大全文粹卷四終

